



## Penyeludupan masih berlaku di sempadan dalam tempoh PKP

08/04/2020 05:01 PM

Anggota penguatkuasa Kementerian Perdagangan Dalam Negeri dan Hal Ehwal Pengguna (KPDNHEP) Kelantan melihat tong plastik berisi minyak petrol yang dipercayai untuk diseludup ke negara jiran pada sidang media di Stor Penyimpanan Eksibit, KPDNHEP Kelantan di Chica, Menyabong hari ini – fotoBERNAMA (2020) HAK CIPTA TERPELIHARA

**KOTA BHARU, 8 April** -- Meskipun dalam tempoh penguatkuasaan Perintah Kawalan Pergerakan (PKP), masih ada segelintir penduduk di sempadan yang masih melakukan kegiatan menyalahi undang-undang terutamanya penyeludupan barangan kawalan.

Bagaimanapun, hasil kerjasama erat antara agensi penguatkuasaan di sempadan seperti Kementerian Perdagangan Dalam Negeri dan Hal Ehwal Pengguna (KPDNHEP), Pasukan Gerakan Am (PGA), Agensi Kawalan Sempadan Malaysia (AKSEM) serta agensi berkaitan lain, penyeludupan itu dapat dikawal.

Ketua Pegawai Penguatkuasa KPDNHEP Kelantan Azanizam Affendi Juri berkata dalam tempoh fasa pertama PKP terdapat tiga kes melibatkan dua rampasan petrol yang berjumlah 890 liter serta 510 kilogram minyak masak manakala bagi fasa kedua PKP sebanyak 300 liter petrol dirampas.

Beliau berkata dalam tempoh 18 Mac sehingga semalam pihaknya juga dengan kerjasama agensi penguatkuasaan lain turut merampas tiga buah kenderaan yang diubah suai tangki serta sebuah bot enjin galah yang digunakan dalam kegiatan penyeludupan di sempadan Malaysia-Thailand.

"Sehingga kini hasil rampasan yang diserahkan kepada KPDNHEP adalah bernilai RM22,092.70. Kes kini dalam siasatan mengikut Seksyen 21 Akta Kawalan Bekalan 1961," katanya kepada pemberita pada sidang media di Stor KPDNHEP di Chica Menyabong di sini, hari ini.



Azanizam berkata penurunan harga bahan bakar seperti petroleum dan diesel tidak dinafikan turut mempengaruhi kegiatan penyeludupan bahan itu.

"Dengan kerjasama agensi penguatkuasaan di sempadan, kita akan cuba mengenal pasti dalang-dalang dalam kegiatan ini untuk tindakan seterusnya," katanya.

-- BERNAMA

[https://www.bernama.com/bm/am/news\\_perintah.php?id=1829857](https://www.bernama.com/bm/am/news_perintah.php?id=1829857)